

**PERSODIPEN LINGKUNGEN
BULAN SISIMPANGANEN JULI 2026**

**SISIMPANGANEN KATOLIK MERDALAN LAKO
MENDENGKOHKEN, MENEGUHKEN DEKKET
MEMERITAKEN MENUJU SISIMPANGANEN SI
MERKARAKTER**



**KOMISI KELUARGA
KEUSKUPAN AGUNG MEDAN**

2026

Kata Solo-solo

Lako menimbak-nimbak Minggu Sisimpanganen i Keuskupan Agung Medan 2026 Komisi Keluarga KAM pepadaken Buku Persodipen Lingkungan/Sisimpanganen sidekkah Bulan Juli 2026. Ipergeddo kami ngo asa Buku Persodipen en ndorok ipakke ibas persodipen i suberri lingkungan/sisimpanganen i paroki-paroki Keuskupan Agung Medan.

Tema pengeradumen ibas persodipen sidekkah Bulan Sisimpanganen en merhenjellen mi Tema Sinode Diosesan VII: **Mendengkohken, Meneguhken, Memeritaken.** Sisimpanganen bage Gereja rumah tangga kennah mengulaken tohonenna, imo: peturahken kepercayaan dekket karakter mendahi gennep anggotana.

Ibas kesadan mi Gereja Keuskupan Agung Medan, genep sisimpanganen Katolik iarahken lako dak tong rebakken merdalan, mersidengkohenken merkite ukur si mbuka, meneguhken si sada dekket sideban ibas kelleng Kristus, janah memeritaken tennah Berita Simerandal merkite kenggeluhen si gennep ari. Tema-tema si nipehantar mi 4 (empat) kali pengeradumen imo:

1. Sisimpanganen Rebbak Merdalan lako Mersidengkohenken.
2. Sisimpanganen Rebbak Merdalan lako Mersipeteguhken.
3. Sisimpanganen Rebbak Merdalan lako Mersiberitakenken.
4. Sisimpanganen Katolik si Sinodal dekket Merkarakter.

Medan, 1 Juni 2026

RP. Andreas Budianto, OFMConv

SODIP SINODE DIOSESAN VII KAM

Ale Debata Bapa, Mul ni suberri Kenggelluhen.
Kami memoji dekket mendokken lias ate mendahi Ko,
kumerna Kono dak tong menegu-negu Gereja-Mu,
Keuskupan Agung Medan, ibagasen terang kelleng
dekket kebenaran-Mu.

Ibas masa si dom pasu-pasu en,
Kono mendilo kami, umat pilihan-Mu,
lako mendalani Sinode Diosesan VII Keuskupan Agung
Medan janah mengarahken kami rebbakken merdalan
lako mendengkohken, meneguhken, dekket memeritaken.

Kupengido kami, giam mo perdalanen Sinodal en
gabe tikki simbadia mi karina umat-Mu, si nidilo-Mu
rebbakken merdalan lako mersidengkohenken si sada mi
sidebanna dekket sora ni Tendi Perbadia, meneguhken
kepercayaan dekket pengharapen merkite pulungen si
kenohe, janah memeritaken Berita Simerandal
merkite semangat misioner janah dom kekkellengen.

Giam mo merkite penegu-negun Tendi Perbadia,
Pengurupin dekket sodip ni Inang Maria,
dekket sodip Beato Dionisius dekket Beato Redemptus,
Sinode en ndorok merdalan rembang mi lemno ate-Mu
asa Gereja Keuskupan Agung Medan
ndorok gabe tanda si ntarar mi pekiroh ni kerajaan-Mu
dekket gabe Oase Ilahi i tengah Dunia.
Merkite-kite Kristus, Tuhannami. Amen.

PENGERADUMEN PERJOLO
SISIMPANGANEN REBAK MERDALAN LAKO
MERSIDENGKOHENKEN

1. Ende Pemungkah

BE No. 105: "Kita si Pulung en"

2. Tanda Silang

P. Ibagasen gerar ni Bapa, dekket anak dekket Tendi Perbadia.

R. Amen.

P. Kelleng ate dekket dame si termurmur i Debata Bapa nai dekket i Tuhanta, Jesus Kristus nai, dak tong mendengani kita.

R. Bagendari dekket soh mi sidekkah ni dekkahna.

3. Kata Pemungkah

Senina-senina si nிக்கெலெngen, ibas perdalanen ni kepercayanta, nggati kalohon ngo kita mersigasang merdalan dekket kerejo, gabe lupa kita meradi sigejap lako mendengkohken. Sidari en, merkite sukuten tersenget Maria dekket Marta, Tuhan mengarahken kita pekoser-koserken lapaten ni "Sisimpanganen si Mendengkohken".

Maria memilih kundul i gambar nehe Tuhan janah mendengkohken Kata-Na. Ia mengajarken banta ukum mendengkohken idi, oda pelin mendengkoh sora, tapi kibuka ukur lako menjalo lemмо ate Debata. Sibukai mo ukur penarihenta, asa merkite pengeradumen en, kita makin mengidah bakune mo asa gabe sisimpanganen si

memettoh mendengkohken Tuhan, mendengkohken si sada dekket sideban, janah mendengkohken pendilon geluhta.

4. Sodip Pemungkah

Ale Debata Bapa Permaseh ate mbellen,
Pemojin dekket lias ate kupesakat kami taba Ko, kumerna kelling dekket pendengani-Mu, memaing ndorok kami merpulung bagendari bage sada sisimpanganen mbelgah i lingkungennami en.

Rembang mi semangat Sinode Keuskupan Agung Medan, kami naing rebakken merdalan ibas kepercayaan. Merkite sukuten tersenget Maria dekket Marta, pesenget mo kami asa ulang manun pelin ibas kesibuken sambing, tapi ndorok memerre tikki lako mendengkohken sora-Mu ibas sodip dekket Kata-Mu, janah mendengkohken si sada dekket sideban merkite ukur si mbuka janah dom kelling.

Merkite-kite Tuhannami, Jesus Kristus, Anak-Mu, si nggelluh janah merkuasa rebakken Ko, ibagasen kesadan dekket Tendi Perbadia, Debata, soh mi amman sumendah.

5. Penjakan Berita Simerandal Lukas 10:38-42

6. Radumen

Senina-senina si nிக்கெல்லெ, semangat Sinode Keuskupan Agung Medan mengarahken kita lako rebbakken merdalan, mersidengkohen, mersipeteguhen, dekket memeritaken kelling Debata ibas kenggeluhen si gennep ari. Sisimpanganen imo "gereja kedek" gabe bekas perjolo semangat en ikenggeluhken. Ibas sukuten tersenget Maria dekket Marta, ntarar ngo siidah bakune

asa ‘mendengkohken’ dekket ‘mengkebasi’ kennah rebbak ikerencetken, oda gabe mersiagoenken. Kusokuso si nggati turah imo: Salah ngo si Marta kumerna perulanna? Alusna: Oda, Marta oda salah.

Marta menimbak-nimbak Jesus merdengkan ukur tutus i bagesna, ia mahan bahan mertuhu-tuhu asa boi memereken pengkebasin si mendena taba Tuhan janah tamuna. Pengelakona tuhu-tuhu pengelako kelleng dekket tanggungjawab. Mula oda lot si Marta mengkebasi, pertamun oda ndorok seppe, janah Jesus pe oda ikebasi mende. Pengkebasin Marta tuhu-tuhu mulia janah iperluken.

Si niperdiateken Jesus oda ngo bahan si Marta idi, tapi perukurena. Marta gabe kekelsohen, gamang, janah mbotongen, memaing mbalang kedamen ukurna, janah ngutnguten mi dedahanna dekket mendahi Jesus. Kesibukenna memaing ia lupa ukum Tuhan si nikebasina mendilo ia asa merkedamen, oda gabe botongen.

Ibas semangat Sinode si mengarahken kita rebbakken merdalan lako mendengkohken, nemuken porsi Maria dekket Marta kennah seimbang, mersipeseppen, dekket mersitongkellen:

1. Porsi Maria: Tikki lako "Meradi janah Mendengkohken."

En ngo henjellen. Sinderang kita madeng memaing, kita perlu mendengkohken. Maria memilih kundul i nehe Jesus, kiperdiateken Kata-Na, janah peditaken ukurna jolon itamuei Tuhan. Ibas sisimpanganen dekket i pulungen Sinode, en merlapaten asa kita menulusi tikki lako mersodip, mengeradumi Kata ni

Tuhan, janah mersidengkohen si sada dekket sideban ibas dom peraten.

Porsina: Kennah gabe permulan dekket sibar-sibar. Mula oda bagi, pengkebasinta gabe kerah, memaing leja, janah memaing ndor melaga bage si Marta.

2. Porsi Marta: Tikki lako "Gumerrak dekket Mengkebasi."

En buah kan mendengkohen. Kessa ukur enggo iisi kelleng Tuhan, kita idilo lako memeritaken kelleng idi merkite perulan si ntarar. Marta pecidahken ulan i rumah tangga, tanggungjawab perkerejon, dekket pengkebasin i tengah masyarakat.

Porsina:

- a. Kennah gabe kelanjutan dekket pecidahken kelleng. Pengkebasin si merhenjellen mi ukur si enggo jolon mendengkohen Tuhan gabe menahang, dom lolo ate, janah oda mengharapken balas.
- b. Oda ma mende mula kita pelin gabe "Maria" si ndong pelin mersodip, oda perduli mi dengan si melehe, mersakit, marang pe si memerlukan pengurupin.
- c. Oda ma ngo mende mula kita pelin gabe "Marta" si ngkasah mahan bahan janah oda lot tikki lako mersodip, meradi, dekket mersidengkohen mi dengan sideban.

Sisimpanganen si merkarakter imo sisimpanganen si memettoh dahari kennah kundul sinok mendengkohen sora Tuhan dekket sora ni anggota sisimpanganenna, janah memettoh dahari kennah keke mengkebasi ibas

kelleng. Katika duana porsi en seimbang, nai kita gabe sisimpanganen si mengkerohken kelleng si pejuahken, bage semangat Sinodenta. Jesus mendokken: "Sada ngo si perluna." Si sada i imo persupanen dekket-Sa. Tah kita kundul mendengkohken bage si Maria, marang pe tah mersigasang bage si Marta, karinana kennah merhenjellen mi kelleng mendahi Tuhan dekket dengan.

Nai rebbakken merdalan mo kita, mersipesengeten, mersiurupen, asa ulang lot pelin sikalak si botongen. Baing mo tikki mendengkohken i nehe Tuhan bage "bensin" si mengisi semangat banta lako mengkebasi ibas sampang ate.

Dak giam mo sisimpanganta dekket karina umat Keuskupan Agung Medan makin mende memaing seimbang i mendengkohken dekket mengkebasi, asa makin ntararna abe Gereja si dom kelleng.

7. Sharing

P. Bagendari sipebages mo pengeradumen en merkite kuso-kuso si lot isen lako mbengket mi sharing pengalaman.

1. Dahari ngo tikki si mendena janah sinok mendahi sisimpanganta lako meradi sigejap janah mendengkohken Tuhan merkite menjaka Lapihen Simbadia marang pe mersodip?
2. Situasi bakune, marang pe pengakap bakune ngo si nggati memaing kita mahal mendengkohken pendapat marang pe kekelsohen ni anggota sisimpanganta sideban?

3. Kade ngo tanda-tandana si taakapken tupung Tuhan mengerana marang pe menegu-negu langkah geluhta?

8. Aksi Ntarar

- P. Menetapkan tikki sinok marang pe menjaka Lapihen Simbadia sigejap, sibar 5-10 menit gennep ari sinderang madeng kitumulai dekket menidungi ulan.
- P. Memaing aturen: "Sikalak mengerana, sidebanna mendengkohken" tupung merarih marang pe tupung peseppeken masallah, oda kipotong perkiranan.
- P. Gennep anggota sisimpanganen merjandi makin peka janah mengkuso: "Kade boi kuurupi?" marang pe "Bakune iakap ko sidari en?"

9. Sodip Pengidon

a. Sisodipken mo Pengendeng Kuria

Dak giam mo Debata Bapa pekongken kepercayaan ni Bapa Uskup, genep Malim, Diakon, dekket karina si menguluku umat. Giam mo kalak idi gabe codin si hantar mendengkohken sora Tendi Perbadia dekket sora umat si nipehedu-heduna, janah ndorok menegu-negu kita rebakken merdalan ibas persupanan si ngkong.

Mersodip mo kita ...

b. Sisodipken mo karina sisimpanganen

Dak giam mo gennep rumahtangganami gabe "Gereja kedek" si mparas. Urupi mo kami asa ulang sibuk sendiri-sendiri, tapi dak mersiberen tikki, mersidengkohen tupung susah dekket senang, janah rebbak memersan kinimbotong asa dame-Mu si termurmur dak mendengani kami.

Mersodip mo kita ...

c. Sisodipken mo gennep Pengendeng Bangsa

Dak giam mo Tuhan memereken ukur si mpantas janah ncerrep mendahi Presiden, gennep menteri, gubernur, bupati/wali kota, dekket karina pejabat negara. Dak giam mo kalak idi rebbakken merdalan dekket rakyat, hantar mendengkohken aspirasi dekket keperluan masyarakat, janah mengkerencetken kemenden ni karina i babo kepentingan pribadi marang pe golongan.

Mersodip mo kita ...

d. Ujud Sodip rembang mi keperluan Lingkungan.

Mersodip mo kita ...

P. Rebbak mo kita menodipken “Sodip Sinode Diosesan VII Keuskupan Agung Medan” (Hal 2)

10. Sodip Bapanami

P. Sipersada mo karina sodip pengidon en mi sodip si niajarken ni Jesus sendiri : Bapanami si nisorga ...

11. Kolekte

BE No. 96: "Tuhan Roh Bamu nai".

12. Sodip Penutup

Ale Debata Bapa Permendebasa kalohon,

Lias ate mo Bamu kumerna enggo mendengani kami sidekkah pengeradumen en. Enggo ipesenet Kono kami merkite sukuten tersenet Maria dekket Marta, bakune pentingna memereken tikki lako mendengkohken sora-Mu dekket sora ni senina-seninanami.

Tuhan, pasu-pasu mo langkahnami asa kami ndorok dak rebbakken merdalan ibas kelleng. Urupi mo kami asa gabe sisimpanganen si hantar janah sabar mendengkohken,

dekket mersitongkelen, asa dame-Mu si termurmur dak
mendengani rumah tanganami be.

Merkite-kite Kristus, Tuhannami.

Amen.

13. Pasu-pasu

P. Tuhan i mo mendengani kita.

R. Bagendari dekket soh mi sidekkah ni dekkahna.

P. Dak giam mo Debata Perkuasa si so tercodi peteguhken,
menegu-negu, mergegohken janah memasu-masu kita
lako mersidengkohen, ibagasen gerar ni Bapa, dekket
Anak, dekket Tendi Perbadia.

R. Amen

P. Senina-senina si nikekkellengen, merkite bagidi
pengeradumen perjolo, si mertemaken Sisimpanganen
Katolik rebakken merdalan lako mersidengkohen,
enggo sidung.

R. Lias ate mo mi Debata.

14. Ende Penutup

BE No. 102: "Mende Merbinendang."

PENGERADUMEN PEDUAKEN
SISIMPANGANEN REBAK MERDALAN LAKO
MERSIPETEGUHENKEN

1. Ende Pemungkah

BE NO. 94: "Sayur Tua"

2. Tanda Silang

P. Ibagasen gerar ni Bapa, dekket anak, dekket Tendi Perbadia.

R. Amen

P. Kelleng ate dekket dame si termurmur i Debata Bapa nai dekket i Tuhanta, Yesus Kristus nai, dak tong mendengani kita.

U. Bagendari dekket soh mi sidekkah ni dekkahna.

3. Kata Pemungkah

Pemojin dekket lias ate mo sipesakat mendahi Debata Bapanta Permendebasa. Sidari en, kita idilo lako merpulung oda mersisikalak si mersirang-sirang, tapi bage sada sisimpanganen mbelgah, ruas Debata. Tema pengeradumenta si perjolo imo **"Sisimpanganen rebak merdalan lako mersidengkohenken"**. Dak giam mo kita karina ndorok mengulakensa, mendengkohen sora bapa, inang, anak-anak, terlebih sora si roh kan Tuhan nai.

Tema pengeradumenta sidari en imo: **"Sisimpanganen Katolik Rebak Merdalan lako Mersipeteguhenken"**.

Ibas perdalanan nggeluh kepercayanta, nggati ngo kita mengakapken leja, roga, dekket mengakap terpunjung menghadeppi tantangan. Tapi, Kata ni Tuhan mengengetken kita ukum kita karina anggota-anggota kan sada daging ngo, imo Daging ni Kristus. Kita oda merdalan pelin sisikalak. Kita rebak merdalan, mersicekepen tangan, mersipeteguhenken, dekket mersitongkel-tongkelen.

Katika lot si ndote, si mergegoh menongkelli. Katika lot si mendelle, sideban memereken pengharapan. Giam mo merkite persodipen sisimpanganen en, ukurta makin ipersada, kepercayanta makin ipeteguh, janah kita makin satdar ukum kita karina mersenina janah irakut ibas kelleng mahan kemulian Gerar-Na.

Sibuka mo ukur penarihenta lako menimbak-nimbak kelleng ate Tuhan bagendari.

4. Sodip Pemungkah

P. Mersodip mo kita.

Ale Debata Bapa Perkelleng bellen,

Lias ate mo kupesakat kami kumerna enggo ipepulung Kono kami bagendari bage sada sisimpanganen, imo ruas Katolik. Kono menghanaken kami oda lako terpunjung, tapi asa nggelluh ibas kesadan dekket kelleng.

Tuhan Jesus, Kono ngo dalan si sentengna.

Sidari en kami roh ibas tema: "Rebak merdalan lako Mersipeteguhenken". Peteguh mo ukurnami asa makin satdar ukum kami en karina mersenina, merkakakuanggi merturang si sada mi sidebanna.

Bereken mo ukur si mbuka bainami lako kiperdiateken, tangan si hantar lako mersiururupen, dekket perkiran si ndorok mersipeteguhenken.

I tengah dunia si dom tantangan en, ulang pediat kami merdalan terpunjung.

Pesada mo langkahnami, pekong mo perseninannami, asa merkite kepercayaan si ngkong kami ndorok rebak mengelangkah mendapatkan Kono.

Kupengido kami, pasu-pasu mo persodipen sisimpanganen en.

Pepanting mo ukur penarihennami, asa karina perulan dekket perkiranannami sidari en merembahkan pasu-pasu mendahi dengan janah gabe pelennami si merdemmu mi lemмо ate-Mu.

Merkite-kite Tuhannami Jesus Kristus, Anak-Mu, si nggelluh janah merkuasa rebakken Ko, ibagasen kesadan dekket Tendi Perbadia, Debata, soh mi sidekkah ni dekkahna. Amen.

5. Penjakan Berita Simerandal Yohanes 20:19-23

6. Radumen

Ibas penjakan Berita Simerandal sidari en, siidah ngo bakune gennep sisin i berngin perjolo kessa kekekken Jesus. Kalak idi merpulung ibas sada bages janah pentu bages i enggo igerruki karina. Kasa? Kumerna kalak idi mbiar.

Kalak i menangkap bage terpunjung, dalmeh, roga, janah gamang. Kalak i menangkap bage itadingken janah gabe buradan. Tapi, kade si masa? Roh ngo Jesus janah cender i tengah-tengah kalak idi. Jesus roh

oda ngo lako kihakimi, tapi lako memereken dame janah meneguhkan.

Lot tellu tennah si mertuhu-tuhu i turpuk en nai, si merdemmu mi tema-nta: Rebak merdalan janah Mersipeteguhken.

1. Kegegohen lot ibas kinirebbak.

Gennep sisin oda lestun merserak mersada-sada. Kalak i rebakken merpulung. Tukasi pe kalak i mbiar, kinirebbak gabe bekas si peteguhkan. Bagidi ma ngo banta pe bage sisimpanganen ruas sipercaya. Kita idilo oda lako mendalani dalan kepercayaan en terpunjung sisikalak. Katika kita rebak merdalan, beban gabe menahang, janah kinimbiar ndorok mobah gabe keberanin.

2. Jesus roh i tengah Perpulungenta.

Jesus mendokken: "Dame mo baundene!"

Katika kita mersada ukur janah merpulung, Jesus roh i tengah-tengahta. Ia roh lako kiagoi kinimbiar, kigancihi pendelen gabe gabe pengharapen, janah kisempulken Tendi Perbadia-Na asa kita gabe teguh. Kepercayaan ipeteguh oda pelin kumerna sodip pribadi, tapi kumerna kita mengakapken pekiroh Tuhan ibas kesadan pulungenta rebakken senina-seninanta.

3. Kita ipesulak lako Mersipeteguhken.

Kessa memereken dame, Jesus mendokken: "Tose bage ipesulak Bapa Aku, bagidi ma mo kene Kupesulak." Nai Ia menempulken Tendi Perbadia taba kalak idi.

Lapatenna, kegegohen si tajalo i Tuhan nai oda ndorok tasimpan pelin banta sendiri. Kita idilo gabe "tangan dekket nehe" Jesus mendahi kalak sideban. Mula lot seninanta si ndote, kita si mergegohna menongkellisa. Mula lot si roga, kita pekekeken kepercayanna. Mula lot si ndabuh, sibereken tangan lako pekekekensa. Kita mersisasan dosa janah mersijalon, tose bage Tuhan enggo memaing bagidi taba kita.

7. Sharing

P. Bagendari sipebages-bages mo pengeradumen en merkite kuso-kuso si lot isen lako mendasdas sharing pengalaman.

1. Dahari perpodi kene mengakap ipeteguh marang pe semangat ndene ipekeke anggota sisimpanganen sideban? Kade idokken marang iulaken kalak i?
2. Kade ngo (rana marang pe perulan) si nggati taruapken/ulaken oda sengaja, keppeken mengugahi ate marang pe kidabuhkan semangat anggota sisimpanganen?
3. Mula lot anggota sisimpanganen si ndabuh mi dosa marang pe tersesak, bakune ngo nemuken sibaing bana rembang mi pengajaren Tuhan?
- 4.

8. Aksi Ntarar

P. Kiperobahi perkiranan: Kigancihi rana kritik/rana kasar gabe rana pedah si membangun (umpamana: daripada mendokken "Kono dakdak

ngo salah", iobah gabe "Situlusi mo bakune sibaing asa mi mendena").

P. Memaing kecemalen "Sada Pojin genep ari": Genep anggota sisimpanganen kennah memoji marang pe kihargai kinimende ni sikalak anggota sisimpanganen sideban genep-genep ari.

P. Merjandi lako mersisodipenken, oda pelin sodip umum, tapi mengeruapken gerar ni anggota sisimpanganen sideban rembang mi masallah si nihadeppina be.

9. Sodip Pengidon dekket Sodip Sinode

a. Sisodipken mo Pengendeng Kuria

Ale Bapa, mendokken lias ate ngo kami kumerna Pengendeng Kuria si dak tong kiperdiateken janah mendasdas kami. Bereken mo Tendi Kepantasan taba kalak idi asa ndorok pepadahkan Kristus i tengah dunia dekket mendasdas ruas lako memaing Kata-Mu bage henjellen ni geluhna i tanoh en.

Mersodip mo kita ...

b. Sisodipken mo Pengendeng Negara

Ale Bapa, dengani mo pengendeng negaranami ibas tugas pengkebasinna menguluken negaranami. Pasu-pasu mo kalak idi asa ndorok merkepantasan, mercerrep ukur dekket mersemangat pengkebasin si kenohe. Pejolang mo ibas diri kalak idi semangat merkorban, bage kesaksin kepercayaan mi kelleng-Mu si menelamatkan.

Mersodip mo kita...

c. **Sisodipken mo gennep si memeritaken Berita Simerandal, guru agama dekket katekis**

Ale Bapa, mendokken lias ate ngo kami kumerna pendilo-Mu si mermulia taba kalak si memeritaken Berita Simerandal dekket si menegu-negu ruas-Mu. Urupi mo asa satdar kalak idi Tendi-Mu ngo mengula janah kibukai ukur karina kalak si menulusi kesentengen. Pekong mo usaha dekket kesetian kalak idi lako kibangun dialog dekket kesaksin kepercayaan ibas pergeluhenna si gennep ari.

Mersodip mo kita...

d. **Sisodipken mo kita si pulung en**

Ale Bapa, pasu-pasu mo kami ruas-Mu si merpulung isen, asa ndorok memeritaken ulan keluahen-Mu taba karina jelma. Dak giam mo kepercayaan, pengharapen dekket kellengnami makin teguhna mi ulan keluahen-Mu mendahi karina jelma. Tegu-tegu mo kami asa dak nggelluh rembang mi Kata-Mu sendiri janah pergegohi mo kami lako mersipeteguhenken si sada mi sidebanna.

Mersodip mo kita...

P. Rebakken mo kita menodipken “Sodip Sinode Diosesan VII Keuskupan Agung Medan”. (Hal 2)

10. Sodip Bapanami

P. Sipersada mo karina sodip pengidonta en mi sodip si niajarken ni Jesus sendiri: Bapanami si nisorga ...

11. Kolekte

BE No. 95: "O Debata Dengkohken mo"

12. Sodip Penutup

Mersodip mo kita.

Ale Debata Bapa Sintembul kalohon janah dom kemulian, kami ruas-Mu mendokken lias ate kumerna Kono dak mendengani kami ibas pengeradumen en.

Urupi mo asa buah ni pengeradumen en ndorok kuulaken kami ibas kenggeluhen lako mersipeteguhenken merkite perulan-perulan kelleng tose bage si niajarken ni Anak-Mu. Dengani mo kami dak tong asa tetap setia mengulaken lemمو ate-Mu. Kupesakat kami sodipnami en taba Kono, merkite-kite Kristus, Tuhannami. Amen.

13. Pasu-pasu

P. Tuhan i mo mendengani kita.

R. Bagendari soh mi sidekkah ni dekkahna.

P. Dak giam mo Debata Perkuasa si so tercodi; peteguhken, mendengani, kipergegohi janah memasu-masu kita lako mersipeteguhenken, ibagasen gerar ni Bapa, dekket Anak, dekket Tendi Perbadia.

R. Amen.

P. Senina-senina si nikekellengi Tuhan, merkite bagidi pengeradumen peduaken ibas tema Sisimpanganen Katolik rebakken merdalan lako Mersipeteguhenken enggo sidung.

R. Lias ate mo mi Debata.

14. Ende Penutup

BE No. 107: "O Bangsa si Tertebus"

PENGERADUMEN PETELLUKEN
SISIMPANGANEN REBAK MERDALAN LAKO
MERSIBERITAKENKEN

1. Ende Pemungkah

BE No. 106: "Poji mo Tuhan Debata"

2. Tanda Silang

P. Ibagasen gerar ni Bapa, dekket Anak, dekket Tendi Perbadia.

R. Amen.

P. Kelleng ate dekket dame si termurmur i Debata Bapa nai dekket i Tuhanta, Jesus Kristus nai, dak tong mendengani kita.

R. Bagendari dekket soh mi sidekkah ni dekkahna.

3. Kata Pemungkah

Senina-senina si nikekellengen,

Ibas pengeradumen petelluken en, kita ibekali merkite tema “Sisimpanganen Rebak Merdalan lako Mersiberitakenken”. Sisimpanganen bage Gereja kedek (*ecclesia domestica*) merdasa tugas penting bage bekas perjolo turah kepercayaan, kelleng, dekket nilai-nilai Kristen, sisimpanganen bage persikolan pengelako mendahi anak-anak. Ibas kenggeluhen si dak merkembang janah dom tantangan, Sisimpanganen Katolik idilo lako rebbakken merdalan, mersiteguhenken, dekket memeritaken kelleng Debata merkite pergeluhen si genep ari.

Merkite pengeradumen en, iharapken gennep Sisimpanganen Katolik makin iteguhkan ibas kenggeluhen si merhenjellen mi sodip, ipersada ibas kelleng, janah idasdas lako memeritaken Berita Simerandal, tah ibas sisimpanganen bagi ma i tengah masyarakat. Persodipen Sisimpanganen gabe dalam si murahna tapi tuhu-tuhu meharga lako mengkerohken Tuhan ibas gennep dinamika kenggeluhen sisimpanganen.

4. Sodip Pemungkah

Ale Debata Bapa Perkelleng si so tercodi,
Mendokken lias ate ngo kami dampak Ko kumerna ibereken Kono ngo sisimpanganen bainami. Idilo Kono ngo kami asa rebak merdalan ibas kelleng, mersitongkel-tongkellen, janah turah ibas kepercayaan taba Kono. Tegu-tegu mo kami, ale Bapa, asa ibas kinirebbak bage sisimpanganen, kami ndorok mersipeteguhenken dekket mersiberitakenken kelleng-Mu merkite rana dekket perulan si gennep ari. Ajari mo kami asa setia mersodip, merukur cerrep ibas mengkebasi, janah dom kelleng ibas menghadeppi gennep tantangan kenggeluhen. Durusken mo Tendi Perbadia-Mu asa gennep sisimpanganennami gabe tanda pekiroh-Mu si nggelluh, gabe cuhaya dekket sira mendahi dunia, janah setia ibas pendilon lako memeritaken Berita Simerandal.

Merkite-kite Tuhannami, Jesus Kristus, Anak-Mu, si nggelluh janah merkuasa rebakken Ko ibagasen

kesadan dekket Tendi Perbadia, Debata, soh mi sidekkah ni dekkahna. Amen.

5. Penjakan Berita Simerandal Matius 28:16-20

6. Radumen

Senina-senina si nikekellengen,
Berita Simerandal sidari en pcedahken banta sada si masa si penting, imo Jesus pesulakken gennep sisin. Menarik, katika sisin mengidah Jesus si enggo keke, kalak idi menembah-Sa, tapi lot deng ma ngo si oda tok ukurna. En pcedahken ukum kepercayaan oda dak merdalan mulus. Salangken sisin pe mengakapken oda tok.

Tapi, Jesus oda menulak marang pe pedaohken diri-Na kan kalak i si oda tok. Sibalikna tupeh, Ia menjolmiti kalak idi. En mo kelleng ni Tuhan: Ia roh tupung kita ndote janah roga. Isidin ai kita terajar ukum Tuhan oda kituntut kesempurnan, tapi keraden lako percaya dekket merdalan rebbak-Sa.

Kessa i, Jesus tangkas pesulakken kalak idi: “Laus mo kene mendahi karina bangsa i suberri dunia en, bakin kene mo kalak i gabe sisin-Ku.” Perintah en oda pelin mendahi sisin tikala i, tapi termasuk ngo mendahi kita karina, bagi ma mendahi karina sisimpanganen Katolik bagendari en. Sisimpanganen idilo gabe bekas perjolo kepercayaan iberitakan; bekas kelleng, pengampunen, dekket kepercayaan taba Tuhan iajarken janah ipergeluhken gennep-gennep ari; sisimpanganen gabe persikolan perjolo mendahi anak-anak janah partua gabe guru perjolo mendahi anak-anak.

Nggati kalohon ngo kita merpikikir ukum memeritaken Berita Simerandal kennah iulaken i bekas si ndaoh janah merkite ulan si mbelgah. Situhunna, pemeritan si ntararna itumulai kan perulan biasa janah cemal: mersikekellengen, mersidengkohenken, rebak mersodip, janah memerre codin si merandal ibas sisimpanganen.

Jesus pe pesohken sada jandi si pekongken ukur: “Dak denganen-Ku ngo kene soh mi ari perpodu.” Lapatenna, kita oda pernah pelin sendiri ibas mengulaken ulan pesulaken en. Ibas gennep usahanta si kedek lako nggelluh ibas kelleng janah memeritaken kinimende, Tuhan dak tong ngo mendengani.

Dak giam mo merkite Kata ni Tuhan en, kita bage sisimpanganen Katolik makin ikuatken lako rebakken merdalan, mersitongkellen, janah berani memeritaken kelleng ni Kristus ibas kenggelluhen si gennep ari.

7. Sharing

- P.** Bagendari sipebages-bages mo pengeradumen en merkite kuso-kuso si lot isen lako mendasdas sharing pengalaman.
1. Mengekutken pendapatndene, kade ngo lapaten “memeritaken” ibas kenggelluhen si gennep ari?
 2. Kade mo si enggo iulaken ibas sisimpanganen lako memeritaken dame dekket kelleng ni Kristus?
 3. Enggo ngo gabe kecemalen ibas sisimpanganen: mangan, mersodip, dekket menjaka Lapihen Simbadia rebbak-rebbakken?

4. Kade ngo tantangan simbelgahna iakap kene lako memeritaken kelling ni Kristus?

8. Aksi Ntarar

P. Rebbak merdalan ibas kepercayaan merkite sodip bage kegegohen lako memeritaken
Tose bage sisin si roh mendahi Jesus, sisimpanganen iarahken asa dak roh mendahi Tuhan merkite rebbak mersodip. I sodip en nai mo sisimpanganen mendapat kegegohen lako mengulaken perutusan: “Laus mo kene mendahi karina bangsa i suberri dunia en, bakin kene mo kalak i gabe sisin-Ku.” Merkite bagi, sodip gabe kerohrohen gegoh si pentingna lako memeritaken kelling ni Tuhan.

P. Memeritaken merkite nggelluh si gennep ari tukasi pe lot kinindote dekket kiniroga
Gennep sisin tetap ipesulak tukasi pe kalak idi oda tok. Bagidi ma ngo sisimpanganen, tetap idilo lako memeritaken Berita Simerandal merkite kelling, pengampunen, dekket keperdulien. Ibas nggelluh si gennep ari, sisimpanganen gabe saksi Kristus merkite perulan si ntarar, ninganna percaya mi jandi-Na: “Dak denganen-Ku ngo kene soh mi ari perpodi.”

9. Sodip Pengidon

- a. **Sisodipken mo Pengendeng Kuria**, ale Bapa Permendebasa, kusodipken kami ngo Paus, gennep uskup, malim, dekket karina perkebas ni Gereja. Pesusur mo Tendi Perbadia-Mu mendahi kalak idi, asa dak tong setia ibas pendilonna bage

permakan ni ruas-Mu. Pekong mo kalak i ibas kepercayan, peteguh mo kalak idi ibas pengharapen, janah domi mo kalak i merkite kelleng ibas pengkebasinna. Dak giam mo merkite codin geluh kalak idi, ruas makin ipeteguh janah ipersada mi kelleng ni Kristus. Mersodip kita ...

- b. **Sisodipken mo Pengendeng Negara dekket gennep si memaing Kebijakan**, ale Bapa Permendebasa, kusodipken kami ngo gennep pengendeng negara dekket gennep si memaing kebijakan. Pasu-pasuken mo taba kalak idi kepantasan, kinitutus, dekket ukur si mbersih asa ndorok lako mendalanken tugas merdeng an adil, mengkerencetken kininduma bai rakyat, janah menjaga kesadan dekket perdamen. Mersodip mo kita ...
- c. **Sisodipken mo si memeritaken Berita Simerandal**, ale Bapa Permendebasa, kusodipken kami ngo gennep si memeritaken Berita Simerandal, gennep misionaris bagi ma kalak si percaya si nipesulak. Pekong mo kalak idi merkite Tendi Perbadia-Mu asa setia ibas perutusan, berani menghadeppi tantangan, janah nunut memeritaken kelleng Kristus merkite rana dekket perulan. Mersodip mo kita ...
- d. **Sisodipken mo kita karina si merpulung en**, ale Bapa Permendebasa, kusodipken kami ngo kami karina si merpulung isen. Pekong mo kepercayannami, persada mo kami ibagasen

kelleng, janah urupi mo kami asa setia merkenggelluhen rembang mi lemmo ate-Mu, janah berani memeritaken kelleng Kristus ibas kenggelluhen si gennep ari. Mersodip mo kita ...

P. Rebakken mo kita menodipken “Sodip Sinode Diosesan VII Keuskupan Agung Medan.” (Hal 2)

10. Sodip Bapanami

P. Sipersada mo karina sodip pengidonta mi Sodi psi niajarken ni Jesus sendiri: Bapanami si nisorga ...

11. Kolekte

BE No. 103: "Kami mendok Lias ate"

12. Sodip Penutup

Ale Debata Bapa Perkelleng mbellen, mendokken lias ate ngo kami kumerna pulungennami ibas persodipen en. Enggo kudengkohken kami Kata-Mu janah karina sodip enggo kupesakat kami taba Kono. Dak giam mo Kono peteguhken kepercayannami, pesadaken kami ibas kelleng, janah peteguhken kami asa setia mendalanken pendilon bage sisimpanganen si rebakken merdalan lako mersiberitakenken tersenget kelleng-Mu ibas kenggeluhen si gennep ari. Dengani mo kami ibas gennep langkah nggelluhnami, asa kade si enggo kuradumi kami en, tuhu-tuhu ipergelluhen kami ibas perulan si ntarar.

Merkite-kite Kristus, Tuhannami. Amen.

13. Pasu-pasu

P. Tuhan i mo mendengarkan kita.

R. Bagendari dekket soh mi sidekkah ni dekkahna.

P. Dak giam mo Debata Pergegoh si so tercodi pekongken, mendengarkan, kipergegohi janah

memasu-masu kita lako mersiberitakenken,
ibagasen gerar ni Bapa, dekket Anak, dekket Tendi
Perbadia.

R. Amen.

P. Senina-senina si nikekellengen, merkite bagidi
pengeradumen petelluken ibas tema
Sisimpanganen Katolik rebbakken merdalan lako
Mersiberitakenken, enggo sidung.

R. Lias ate mo mi Debata.

14. Ende Penutup

BE No. 101: "Bage Pancur Roka-Mi"

PENGERADUMEN PEEMPATKEN
SISIMPANGANEN KATOLIK SI SINODAL
DEKKET MERKARAKTER

1. Ende Pemungkah

BE No. 100: "Bapa si Mende Basa"

2. Tanda Silang

P. Ibagasen gerar ni Bapa, dekket Anak, dekket Tendi Perbadia.

R. Amen.

P. Kelleng ate dekket dame si termurmur i Debata Bapa nai dekket i Tuhanta, Yesus Kristus nai, dak tong mendengani kita.

R. Bagendari dekket soh mi sidekkah ni dekkahna.

3. Kata Pemungkah

Senina-senina si nikekellengen ibas Kristus, Sidari en kita merpulung nola meneruskan pengeradumenta lako kirimang-rimangi sub tema peempatken. Sinderang madeng mbengket mi tema peempatken, lot ngo mernenget deng kade tema 1, 2, dekket 3? (ibereken mo tikki taba ruas lako mengaloi). Lias ate mo. Tema peempatken si lako siradum-radumi sidari en imo: **Sisimpanganen Katolik si Sinodal dekket Merkarakter**. Tema en gabe punca ni tema-tema si enggo salpun.

Sisimpanganen Katolik si Sinodal dekket Merkarakter si nimaksud imo Sisimpanganen si rebbakken merdalan lako mersidengkohen i sora ni dengan dekket i sora ni Tuhan, Sisimpanganen si

mersipeteguhenken tupung lot kinindote, dekket sisimpanganen si ndorok memeritaken kesaksin geluhna rembang mi Kata ni Tuhan, janah sisimpanganen si merdasa standar-standar pengelako si enggo iarihken rebbak anggota sisimpanganen.

Merkite mengeradumi tema en iharapken karina umat katolik i Keuskupan Agung Medan gabe sisimpanganen si mengkenggeluhken tennah ni Berita Simerandal, nai gabe ndorok memeritaken janah mengkesaksikan geluhna ibas kenggeluhken si gennep ari.

4. Sodip Pemungkah

Ale Debata Bapa si dom kelleng,
Kono mendilo kami nggeluh bage sada sisimpanganen ibas kelleng dekket kesadan. Pesusur mo Tendi Perbadia-Mu taba kami, asa ndorok kami menghasilkan buah-buah Tendi ibas kenggeluhken sisimpanganennami: kelleng, lolo, dame, sobar, dekket mengerajai diri.

Tegu-tegu mo asa kami gabe sisimpanganen si sinodal dekket merkarakter si rebbakken merdalan ibas cuhaya kekelengen-Mu.

Merkite-kite Tuhannami, Jesus Kristus, Anak-Mu, si nggelluh janah merkuasa rebbakken Ko ibagasan kesadan dekket Tendi Perbadia, Debata, soh sidekkah ni dekkahna. Amen.

5. Penjakan Galatia 5:16-26

6. Radumen

Senina-senina dekket sisimpanganen si nikekelengen,

Sisimpanganen imo persikolan perjolo janah si pentingna, bekas pengajaren nilai karakter mendahi anak-anak. Mula sisimpanganen bage persikolan, tentu partua mo bage Guru. (En rembang mi Tri Tugas Orang Tua, imo: bage Guru, Malim dekket Permakan). Bage guru ibas sisimpanganen, oda pelin mengajarken nilai-nilai karakter mendahi anak, tapi tong ma ngo mengajarken nilai-nilai kepercayaan.

Nilai-nilai kepercayaan si pentingna isuanken taba anak imo tose bage si niajarken ibas Kata Debata si enggo tadengkohken ndai, si nikutip kan Kitab Galatia 5:16-26, terlebbih i ayat 22-23, imo: “Tapi en buah si enggo iarak-arak Tendi Perbadia: Kelleng, lolo, dame, sobar, budi, ate mbersih, setia, merukur ncerrep, mengerajai diri...”

Kata ni Tuhan sidari en mengengetken ukum sisimpanganen si nggeluh ibagasen Tendi Perbadia kennah menghasilken buah-buah si merandal. Kata ni Tuhan en mengendesken ma ukum “Buah Tendi” imo sibah karakter si kennah ipecidah kalak si niarak-arak Tendi. Ayat en menggambarkan ukum karakter Kristus oda pelin tose mi aturen marang pe pelin teridah i perulan, tapi gabe tanda si tuhu-tuhu nggeluh ibas diri kalak si niperobahi Tendi. Buah Tendi mengajarken ukum karakter si kenohe oda turah kumerna pelin aturen marang pe tekanan sosial, tapi turah merkite hubungan si mende mi Tuhan.

Kata ni Tuhan en gabe Penegu-negun Simbadia mendahi Sisimpanganen Katolik si merkarakter. Merkite bagi, Sisimpanganen Katolik si Sinodal

dekket Merkarakter ndorok iruapken begen: Sisimpanganen Katolik si mersidengkohen si sada mi sideban dekket mendengkohen sora Tuhan, mersipeteguhken tupung ndote, janah ndorok memeritaken nilai-nilai kepercayaan ibagasen kenggeluhen si ntarar, janah mengkenggeluhen buah Tendi dekket merdasaken standar pekilako si enggo iarihen ibas sisimpanganen, janah ma ndorok gabe inspirator taba sisimpanganen sidebanna. Lebbih tangkasna, sisimpanganen merkarakter imo: Sinibale Merkarakter, Sinibages Merkarakter, Anak-anak Merkarakter, dekket Bages si mekut ma pepadahkan Pengianna gabe Merkarakter.

7. Sharing

P. Senina-senina, bagendari sipebages mo pengeradumen en merkite kuso-kuso si lot isen lako mendasdas sharing pengalaman.

1. Buah Tendi apaina ngo si mahalna idalanken ibas sisimpanganta?
2. Kade ngo tantangan simbelgahna lako menjaga keharmonisen sisimpanganen?
3. Bakune ngo Figur: Sinibale merkarakter, Sinibages merkarakter, Anak merkarakter?
4. Kade ngo langkah si ndorok konsisten ipetupa lako pesautken sisimpanganen merkarakter?

8. Aksi Ntarar

Kessa mengeradumi tema peempatkan en, kade mo aksi ntarar si ndorok taulaken?

Umpamana.

1. Memaing jadwal sodip sisimpanganen

2. Memaing kesepakaten sisimpanganen
3. Memaing pembagian tugas anggota sisimpanganen
4. sidebanna?

9. Sodip Pengidon dekket Sodip Sinode

a. Sisodipken mo Pengendeng Kuria

Ale Bapa Perkelleng mbellen, mendokken lias ate ngo kami kumerna pengendeng gerejanami si enggo memereken dirina gabe perkebbas mi ruas-Mu. Bereken mo taba kalak idi buah-buah Tendi asa makin mergegoh lako memeritaken kelleng-Mu ibas geluhna, janah ndorok gabe codin bainami. Mersodip mo kita....

b. Sisodipken mo Pengendeng Negara

Ale Bapa si merkepantasan si so tercodi, durusken mo Tendi Kepantasan-Mu taba gennep Pengendeng Negara dekket bangsanami, asa dak tong mengkerencetken kininduma dekket keadilan mendahi jelma mbellang. Bereken mo semangat taba kalak idi asa dak hantar kiperjuangkan kemajun bangsa dekket negaranami.

Mersodip mo kita...

c. Sisodipken mo karina Sisimpanganen

Ale Bapa kerohrohen ni karina kinimende, pasu-pasu mo karina sisimpanganen si lot i lingkungennami en. Tegu-tegu mo kami asa ndorok mersidengkohen, mersipeteguhen dekket memeritaken, janah ndorok ma

mengkenggeluhkan buah-buah Tendi-Mu, nai kami gabe sisimpanganen si merkarakter janah gabe codin mendahi sisimpanganen sidebanna i sikulilingnami.

Mersodip mo kita ...

d. Ujud sodip i lingkungan nai ...

P. Rebakken mo kita menodipken Sodip Sinode
Diosesan VII KAM (Hal 2)

10. Sodip Bapanami

P. Sipersada mo karina sodip pengidonta mi Sodip si niajarken ni Jesus taba kita: Bapanami si nisorga ...

11. Kolekte

BE No. 104: "Sipekade dunia en"

12. Sodip Penutup

Pemojin dekket lias ate mo kupesakat kami mendahi Kono, ale Bapa, kumerna enggo itegu-tegu Kono kami ibas pengeradumen berngin en. Giam mo merkite Kata-Mu dekket Sharingnami, sisimpangan-sisimpangannami pe makin ipeteguh. Dak giam ma mo merkite rebbakken merdalan, kami makin sadana janah harmonis. Karinana en kupesakat kami Bamu, merkite-kite Kristus, Tuhannami. Amen.

13. Pasu-pasu

P. Tuhan i mo mendengani kita.

R. Bagendari dekket soh mi sidekkah ni dekkahna.

P. Dak giam mo Debata Perkuasa si so tercodi i pekongken, mendengani, mergegohken dekket memasu-masu kita menuju sisimpanganen si merkarakter, ibagasen gerar ni Bapa, dekket Anak, dekket Tendi Perbadia.

R. Amen.

P. Senina-senina si nikeleng Tuhan, merkite bagidi
pengeradumen peempatken ibas tema
Sisimpanganen Katolik si Sinodal dekket
Merkarakter, enggo sidang.

R. Lias ate mo mi Debata.

14. Ende Penutup

BE No. 92: "Merlolo Ate"